

ist jesse die Ruhe vnd der innerliche Friede des Geistes: je schwerer es mit der Cur vnd Heilung zuvor hergangen / vnd je öfter der Mensch solches bey sich erwigt / je mehr Erquickung hat er / daß gleichwol alles überwunden / vnd der Herr ihn auß allen nöthen errettet.

Solches alles wirckt Gott der heilige Geist in denen bekehrten bußfertigen / glaubigen vnd curirten Gewissen / wenn sie sich nach vorgeschriebener Ordnung leiten lassen / vnd in denen vorgehaltenen meditationibus vnd betrachtungen beständig fortfahren: vnd ist bereit sie in allen stücken / so zu ihren Trost vnd Heil dienen / sie je mehr vnd mehr zu stärken / zubefestigen / zugründen / zuverwahren / daß sie lauter vnd vnangestößig erfunden werden auff den Tag Jesu Christi / ja auff den Tag ihres Abschieds auß dieser Welt / auch auff den grossen Tag des letzten in stehenden Gerichts / daß sie in demselben mit geheilten guten frölichen Gewissen erscheinen / vnd samt allen außgewählten in den Ort der ewigen freuden eingehen mögen / dazu vns allen auß gnaden verheissen wolle Gott der Vater durch Jesum Christum in Krafft des Heiligen Geistes / Amen.

Die Neun und dreissigste Predigt.

Von der Erhaltung der Gewissens - Gesundheit durch den Gebrauch der gegenwertigen Dinge.

Exord. ex Apocal. 2. v. 25. ubi Filius Dei graviter monet Thyatirenses, ut custodiant, quod habent, & sic

1. Significat, quid habeant, scil. Spirituales thesauros.



Liebte in Christo: Denen Glaubigen vnd bekehrten in der berühmten Statt Thyatira thut der ewige Sohn Gottes Apoc. 2. eine ernste Vermahnung / daß sie das jenige / was sie haben / behalten sollen bis auff seine Zukunfft: Er spricht / was ihr habt / das haltet / bis daß ich komme.

Gibt ihnen erstlich zuerkennen / daß sie haben / nemlich herrliche / vortreffliche / geistliche Schätze vnd Güter / ja haben zuvorderst den unvergleichlichen Schatz des heiligen Evangelii vnd der seligmachenden Lehr / die er ihnen geoffenbahret / vnd dazu er sie beruffen: haben auß vnd durch dieselbe die wahre erkantnis Gottes vnd den rechten Glauben / haben durch den Glauben die Gnaden - Kindschafft Gottes / daß sie sich rühmen können / sie sein Kinder Gottes / haben vergebung aller ihrer Sünden / haben Gerechtigkeit vnd Heiligkeit / vnd daher auch

inson-